

### Ngaraard

A Ngaraard a *Kerradel* ra rechuodel, e leng ngarnsii a teblong el meklou el blingelel. Ma lobii, ea kldei a mo desbedall ea teblong a keiukl. Ea desbedall a ulengakl el *Ngaraard*, ea keiukl a *Ngebuked*, el belkul a *Ngebubs*, e leng di mle ngii el ngariou el me duum ra rechuodel. Ea blingelel a *Ngebuked* ma Ulimang a keiukl, ea Elab ma Chol ma Ngkeklaa a desbedall. Ma rubekul a ika el beluu a mlo dmak e odekiar a beluu el mo di tang, ma bo el tang eng uaia le kleim el meklou el bliongel eng mo *Kerradel*, el belkul a ldak e te ke reng a reng e uldak. E dirrek el kerodel a bitang ma bitang.

### Ngcheangel

A Ngcheangel a mle *Ngedebuul* a ngklel ra rechuodel, el belkul a kmo ng *cheldellel* a *ulebdebuul* el otao ma *urrached*. E le Dirrabakerus el uchul a beluu e ra Ngcheangel a mlengedechudel a ikang e kudmeklii el mo beluu.

### Ngchesar

A *Oldiais* el ngklel a Ngchesar ra rechuodel a mlengai ra tekoi el *diais*. A Ngchesar a beches el beluu el mle mesúmech ra delongelel a kleim el uades el beluu, e ngarisei e kaudiais a ika el kleim el beluu a uchul me ng *Oldiais* a ngklel, e chelechang e ke domekedong er ngii el kmo *Ngchesar*.

### Ngeaur

A Ngeaur a *Edeaur* a ngklel ra rechuodel, e le ng edei el Ngeaur. Ngarnsii a *Ngermasech* ma *Ngebeanged* ma *Ngerbelau*.

### Ngerchelong

*Euid el chelong* a ngklel a Ngerchelong ra rechuodel, e leng uldekial a euid el kakerous el beluu ra keiukl ma desbedall el chelong, e chelechang el sils e ng okedongall el kmo *Ngerchelong*.

A *Delbirt* a mle ngklel a beluu er Ollei ra rechuodel. Tia el beluu a mle euang el taoch el belkul a mle kleuang el renged. A *Delbirt* a tekoi el melutk a birir a rubak e mle blechoel el klikiid a telbilel el ko ra *delbirt* el cheliuis. Chelechang el

sils e ng okedongall el kmo *Ollei* el beluu ra *Ngerchelong*.

### Ngardmau

A Ngardmau a belurir a re beches el merrael el chad el mei er ngii e meleketek er ngii el mo belurir, me ng betok a cheldecheduch el lechur a bek el rengedel a Ngardmau ma klauchad er ngii el obengkel a bebil ra beluu ra chelsel Belau el kakerous a omesodel. E ng di mlo kerbil a uldekial tia el beluu er Ngardmau e ng mo imong el beluu a omengedechuul, me te mlengedechuul el kereng a reng e uldekiar el mo imong el beluu ma uchul eng mle *Ongedechuul* a ngklel, e Ngardmau a ngklel er chelechang el sils.

### Ngeremlengui

A rechuodel el ngklel a Ngeremlengui a *Imeungs* el mlengai ra tekoi el *chim* ra *iusech*, le ng klou el chad meng ngulserechakl a rengul.

### Ngatpang

A Ngatpang a mlengai ra tekoi el *dbard* le tia el beluu a klemchokl el *delbard* el nga ra keiukl el mo ra desbedall. Ma klubed ra Ngatpang a Ngchesar ra mo bedul a desbedall, ea mo bedul a keiukl a uleiull me ng ngar ngii a belkul a tekoi el kmo te mengol ra belngel olukl. Ma kmal merang el omelkingel a Ngatpang ra ngaramong a *Ngedbard*.

### Ngiwal

A *Kiueluul* a ngklel a Ngiwal ra rechuodel, el eng ngarnsii a kingellel a keluláu el *ongeluluul* a ngklel el ngara Ngiwal. Ma *Kiueluul* a mlengai ra tekoi el *ongeluluul*.

### Oreor

A ngklel a Oreor ra rechuodel a *Sureor*, e tiang a ngklel ra delal ra Milad e le ng mle odikel. E tia el beluu a mlo *Ernguul* el belkul a reng er sei ra lengai a *otelchelel* el beluu el mla re bitang er ngii el odak el mo imong el beluu e ng mlo mungakl el kmo *Ernguul*. Chelechang el sils eng *Oreor* el mlengai ra *Sureor*.